



17. januar 2017

Inatsisartut Suleriaasianni § 37 naapertorlugu Naalakkersuisunut apeqqutit imaattut matumuuna saqqummiuppakka:

Naalakkersuisunut apeqqutit kommunit pilersaarutaat pillugit:

- 1. Naalakkersuisunit eqqarsaatigineqarsimanerluni kommunit sinnerinut piunasaqaatigissallugu, siuariartornissamut pilersaarusiortoqassasoq Kommuneqarfik Sermersuup illoqarfiit pingaarnersaattut pilersaarutaanut eqqaanartumik?**
- 2. Naalakkersuisut nuna tamaat eqqarsaatigalugu siuariartornissamut arlariinnik pilersaarusiornikuunerlutik? Taamaassimappat itisileeqquneqarpusi. Taamaangippat, tamanna pilersaarutaanerluni?**
- 3. Kommuneqarfik Sermersuup Borgmesteriata (aamma kommunalbestyrelsip tamarmiusup) tusagassiutinut illoqarfiillu pingaarnersaata pilersaarutaani oqaatigaat anguniarlugu 2030-mi illoqarfiit pingaarnersaat 30.000-nik innuttaqalissasoq kiisalu 70.000-tit missaanik (Qanorooq uge 2) nuna tamarmi innuttaqalissasoq. Anguniakkanut taakkununga Naalakkersuisut qanoq isumaqarpat - aamma Naalakkersuisut namminneq tamatumunnga tunngatillugu qanoq anguniagaqarpat?**
- 4. Naalakkersuisut isumaqataanerlutik, kommunit tamarmik immikkut ilungersorlutik pitsaanerpaamik sulissutigisariaqaraat siuariartornissamut pitsaasunik sinaakkusiornissaq kommuniminnilu periarfissanik pilersitsissasut? Kiisalu kommunit kalaallinut, Kalaallit Nunaata avataaniittunut sinaakkutissanik pitsaasunik sanassasut taakkunani angerlarusunermik kiisalu nunap ineriartorneranut suliaqataarusussutsimik pilersitsisumik?**
- 5. Naalakkersuisut isumaqarnerlutik nunami borgmesterit nammineq kommuniminni ineriartortitseqqinnissaq akisussaaffigigaat ?**



(Inatsisartunut ilaasortaq Randi Vestergaard Evaldsen, Demokraatit)

Tunngavilersuut:

Ukiorpassuarni takunikuarput piffissaq ungasinnerusoq isigalugu siuariartornissaq pillugu pilersaarusiortoqarneq ajortoq tamannalu nunami maani amingaataasoq. Piffissaq qaninnerusoq isiginerullugu pilersaarusiortoqaqqajaasoqartarpoq - tassalu ukioq missingersuusiorfik ataaseq isigalugu.

Siuartornissaq pillugu pilersaarusiortoqartarnissaanut piumasaqartoqartalernissaa Demokraatini isumarput eqqarsariaaserpullu naapertorlugu pisortaqarfinni oqartussaaffiit piffissaq ungasinnerusoq isigalugu aaqqissuusaaanerusumik pilersaarusiortalernerannik pingaarnersiuisalernerannillu kinguneqassagalarpoq, nunamut tamarmiusumut innuttaanullu nuannaarutaasumik.

Kalaallit Nunaanni Naatsorsueqqissaartarfiup innuttaasut amerliartornissaannut taggiinera aallaavigigaanni, ukiut tulliuuttut 23-t ingerlanerini nuna 4000-nik ikinnerusunik innuttaqalissaaq. Tamanna Demokraatini sioranarluinnartutut isigaarput. Kalaallit Nunaata naalagaaffinngorniarluni takorluuineranuinnaanngitsoq kisiannili aamma Kalaallit Nunaata periarfissaanut nunatut namminersortutut ingerlanerani.

Demokraatini isumaqarpugut, innuttaareersut pigiinnarniarnerisa saniatigut aamma kalaallit Danmarkimi nunanilu allani najugaqartut angerlarartinniarsarinissaat pingaaruteqartoq.

Naalakkersuisut 2010-mi januarip qaammataani Kalaallit Nunaanni nuttartarnek pillugu nalunaarut saqqummiuppaat, tasanilu takuneqarsinnaavoq piffissami taamani kalaallit 15.000-ngajaat Danmarkimut nuussimasut, tassaallutik kinguaariit siulliit taakkulu kinguaavi siulliit.

Nooqqammersut affaasa missaat kiisalu nuuttut kinguariit siulliit 30 procentiisa kissaatigisimavaat Kalaallit Nunaannut uteqqinnissartik. Aamma takuneqarsinnaavoq utissagunik sinaakkutissat pisariaqartitatik uterfissaminni iluarsineqarsimasariaqartut, tassaasut suliffissat, inissat, meeqqeriviit atuarfiillu.



Neriuppugut nunami siuariartortoqalerumaartoq, suliffissat amerlanerit pilersinneqarsinnaaqullugit aamma pilersillugu aningaasarsiorneq imminut napatittoq. Tamatumali kingunerisariaqassavaa, sulisussanik amerlanerungaartunik pisariaqartitsilernissaq nunamik siumut aallariartitsisussanik.

Taamaattumik Demokraatini isumaqarpugut pisortaqarfinni oqartussaaffiit tamarmik angusassamik toraagaqarlutik aningaasarsiornikkut siuariartornissaq taamatullu innuttaasut amerliartornissaat sulissutigissagaat. Demokraatini aamma pingaartipparput, nunami borgmesterit akisussaaqataassasut kommuniminnilu pilersaarusiortitsillutik, innuttaasa takusinnaaniassammatigit piffissaq ungasinnerusoq isigalugu kommunip pilersaarutai kiisalu siuariartornissamut periarfissat suunersut, qanoq sumilu sanaartortoqassanersoq ilaalu ilanngullugit.

Apeqqutit akeqquakka ullut suliffiit naliginnaasut qulit iluanni.